

欽定大清會典事例

欽定大清會典事例卷一百四十五

吏部

土官 土官承襲 土官請封 土官大計

土官承襲。○順治初年定。土知府。同知。通判。知州。州同。州判。吏目。知縣。縣丞。主簿。典史。經歷。知事。巡檢。驛丞。等文職承襲。由部給牒書其職銜。世系及承襲年月於上。名曰號紙。其應襲職者。由督撫察實。先令視事。令司府州縣鄰封土司具結。及本族宗圖。原領號紙。咨部具題請襲。○又定。凡承襲之土官。嫡庶不得越序。無子許弟

承襲族無可襲者。或妻或婿。為夷衆信服者。亦許承襲。子或年幼。由督撫題明註冊。選本族土舍護理。俟其年至十五歲時。請襲。○又定。土官年老有疾。請以子代者聽。○又定。土官親生之子。未滿十五歲者。該督撫題明註冊。將土司事務。委族人護理。俟其子長成。具題承襲。如土官受賄隱匿兇犯逃人者。革職提問。不准親子承襲。擇本支伯叔兄弟兄弟之子繼之。若有大罪被戮。即立夷衆素所推服者。以繼其職。○康熙二十一年議准。土官受賄隱匿兇犯逃人者。革

職提問不准親子承襲。擇本支伯叔兄弟兄弟之子繼其職。○二十五年議准督撫提鎮等官。如有需索土司以致起釁者。許該督撫互相糾參。將啟釁之人革職。從重治罪。如督撫互相容隱。一併從重治罪。至土司苗民等不遵約束。肆行搶奪。無故侵擾內地居民者。該督撫等一面題明情由。一面發兵勦滅。○三十五年覆准土官公罪。應降三級。以內調用者降一級。留任。應降五級。以內調用者降二級。留任。應革職者降四級。留任。如有貪酷不法等罪。仍革職。○又覆

准凡土官有

欽部案件奏銷錢糧及遲誤表箋等項均照流官例一體處分。土官不食俸祿。如有罰俸降職等事俱按其品級計俸罰米。每俸銀一兩罰米一石。○雍正三年覆准各處土司嫡長子孫承襲其支庶子弟中有馴謹能辦事者俱許本土官申請督撫題給職銜。令其分管地方事務。其所授職銜視本土官降二等。如土官係知府則所分者給通判銜。土官係通判則所分者給縣丞銜。其分管疆土視本土官或三分之一或五分之

一。再有子孫可分者。分土如前例。授職再降一等。○又覆准。凡土官病故。該督撫於題報時。即查明應襲之人。限六箇月內具題承襲。如違限。將該管上司照例議處。○五年具奏雲南鎮沅地方改土為流。應將刀瀚家口遷住省城。奉

旨。疏內所稱刀瀚家口遷住省城之處。朕思伊之家口。若留本省。管束太嚴。則伊等不得其所。若令疏放。恐復生事犯法。刀瀚之家口。著遷住江甯省城。令該督酌量安頓。務令得所。凡有改土為流之土司。其遷移何處。及如何酌給房產。俾得存養之處。著九卿酌量

土司所犯罪案。分別詳慎具奏。○六年

諭。湖廣土司甚多。各司其地。供職輸將。與流官無異。其不守度者。該督撫題叅議處。改土為流。以安地方。若能循分奉法。撫綏其民。即與州縣之循良相同。朕深嘉悅。何必改土為流。使失其世業。前據湖南巡撫王國棟奏稱。下崗長官司向鼎晟懇請改土為流。甚為誠切。朕未准行。今又奏稱。土民有控告該土司之案。正在查審。朕思從前該土司改土為流之請。大抵由於土民之怨。慮及土司所請未曾准行。而土民復又列款控告。冀朕嚴治土司之罪。而盡改為流。其所控

必非實情。著該督撫留心詳察。凡屬土民。必不敢控告土司。皆由漢姦唆使播弄。冀生事端。以便從中逞姦滋弊耳。若各處土司等。因他處已改為流。不得已而仿效呈請者。朕皆不准。若被漢姦唆使控告。俾土司獲罪而改土為流者。朕更不忍。該督撫等當以朕內外一體之懷。通行曉諭。俾土司等守土奉法。共受國恩。不必改土為流。始為嚮化。至於土司實在不法。惡迹確著者。該督撫據實叅劾治罪。○八年覆准。改土歸流之土司家口。由各該督撫據實確數。其妻妾子女。與應遷之父母兄弟。照例遷徙。如該

土司止有妻妾。並無子嗣。及子嗣幼小。又無應遷之父母兄弟。即將伊妻妾幼子。安插於本省省城。令地方官稽查約束。毋許生事。至犯軍流罪。改土歸流之土司家口。無論有子無子。照例隨同本犯遷徙外。如本犯未遷之先身故。及子嗣幼小者。亦將伊妻妾幼子。安插省城。令地方官稽查管束。毋許生事。該督撫即將應行遷徙與應留本省情由。於疏內聲明。取具地方官印甘各結。報部查覈。○又議准土司並家口。遷於遠近省分安插者。飭令該地方官不時稽查。毋

許生事擾民出境如疏縱土司本犯將該地方
官照軍流罪犯取保脫逃例議處如疏縱土司
家口照疏脫逃回原籍人犯例議處○又覆准
土司隱匿兇犯逃人不行拏解俟獲犯之日訊
明如係土司受賄將土司革職提問不准親子
承襲擇本支伯叔兄弟子姪取具宗圖並夷衆
信服印甘各結題請承襲如係隱匿不報革職
審無受賄情弊仍照定例承襲○乾隆二十七
年

諭開泰等奏金川請襲土司莎羅奔之缺毋庸取具土

舍頭人暨鄰封土司甘結一摺在該督等如此辦理
意在直截簡便且不令土司等復因此通通附和所
見固是然不為郎卡等明白宣諭恐此等土舍不知
懷畏轉疑開泰等有意遷就一似徇其所請竟不待
各處甘結者然或致潛生驕縱殊非控馭之道著傳
諭開泰岳鍾璜即行曉諭郎卡等謂鄰近土司與爾
素有嫌隙今因承襲之事照例取結伊等定不樂從
今據爾懇求免其輾轉取結以示加惠土司之意但
襲職之後在爾與鄰境諸部即不能相協而封疆大
臣亦斷不肯為爾少貸如此方足令其知所做惕於

體制亦為允協。○二十九年議准學政全書開載土
司應襲子弟。令該學立課教訓俾知禮義。俟父
兄卸事之日。回籍襲職等語。嗣後邊省土司地
方。凡由生員襲職者。如事務繁多。自揣不能應
試。即具呈告退。其願應試者。飭令如期應試。不
得託故避考。違者該學政即照定例褫革。○三
十三年奏准土官襲替定例。必分嫡次長庶。不
得以親愛過繼為詞。如實係土官身故。乏嗣除
篤疾殘廢及身有過犯。與苗民不肯悅服之人。
例不准請襲外。其承繼之子。仍論其本身支派。

如非挨次承襲者。不准襲職。○五十年

諭據保甯等奏鄂克什土司色達拉年老久病呈請辭
休懇將伊子斯丹增甲木楚承襲土職等語色達拉
前在金川軍營帶領土兵打仗出力曾經賞戴花翎
並賞給二品頂戴今因年老久病懇請辭休著加恩
賞緞二疋准其辭休並准戴原賞花翎頂戴所有鄂
克什安撫司土職即著伊子斯丹增甲木楚承襲至
斯丹增甲木楚襲職後自應按照土司品級頂戴第
念伊父前在軍營著有勞績伊子亦曾經出力著加
恩准其戴用伊父二品頂戴以示獎勵○又覆准各

省土官。向無地方郵寨管轄者。將原襲文職改授土官。如土通判改授正六品土官。土推官改授正七品土官。土縣丞改授正八品土官。土主簿改授正九品土官。土巡檢改授從九品土官。遇襲替時。止准換給號紙。按照品級填寫幾品土官。不必仍書通判推官縣丞主簿巡檢等字樣。向有給予印信者。將印信咨送禮部銷毀。其有管理地方之土官。仍循舊制。毋庸改授職銜。

○五十四年議准。土田州知州岑宜棟深明大義。臨陣捐軀奉

旨交部從優議卹。照綠營陣亡官員四品以下未入流以上例議給雲騎尉。俟襲次完時給予恩騎尉。世襲罔替。○五十八年

諭富綱奏審擬環洲夷人李泰親絕產妄爭土職一摺。將豫圖襲職之李泰及圖分絕產之李素權問擬充軍。並案內通信附和人犯分別定擬杖徒。其環洲土舍查有李魁衡堪以充當。即請襲替等語。該督既審訊明確。其應襲之人亦稱堪以頂襲。自可照所奏辦理。惟摺內所稱已故土舍李素明所遺家資內酌撥田地房產衣服家具。給予李魁衡承管。其餘所存

金銀租穀等項。通共估值變價入官。充公等語。所辦非是。此等土夷遺產。既經承襲有人。自應一併給予承管。俾資養贍。夷衆辦理公事之需。况土夷遺產。從無變價入官之例。著富綱即將查出奏請變價各項。給予承襲土舍之李魁衡一併承管。俾資雇覓土練。巡緝地方之用。該督務嚴飭承辦官員。妥為經理。毋任胥役藉端滋擾侵蝕。方為妥善。○又

諭

向來綠營陣亡官兵。俱給予世職。俟襲次完時。給予恩騎尉。世襲罔替。原以軫卹勳勞。特加優典。至屯土官弁。遇有徵調。無不踴躍爭先。著有勞績。而臨陣捐

軀者。向止給予賞卹銀兩。分別加銜。並未一體議給。世職該屯土員弁。與綠營同一效命疆場。而卹典各殊。未免稍覺向隅。嗣後屯土官弁。設遇調發。有隨征陣亡者。均著照綠營之例。按照實任職分。給予世職。俟襲次完時。再給予恩騎尉。世襲固替。以副朕一視同仁。獎勵忠蓋之至意。欽此。遵

旨議定。嗣後屯土官弁隨征陣亡。應行承襲者。由兵部

覈定具題奉

旨。後移咨吏部。揭送內閣。撰給

敕書。照例頒發。○嘉慶五年

諭前此征勦黔楚苗匪陣亡傷亡土弁克丕等十四名
既經查出俱係空銜並非實缺例不准廕襲所有議
給世職加銜之處自應註銷仍行令各路軍營及各
督撫嗣後遇有請卹之案務將實缺空銜詳悉聲敘
○光緒四年覆准土官改土歸流奉

旨賞給該土官子弟頂戴田產存留奉祀者准該後
裔承襲由督撫查照世職承襲定例嫡庶不得
越序取造宗圖冊結具疏請襲由部覈明題請
給予頂戴准其承祀奉

旨後知照該督撫轉飭遵照毋庸發給號紙

土官請封。○乾隆三年議准。凡土官請封。由該督撫覈明具題。一面出咨。徑由提塘遞送投部。部限三月彙題得。

旨後揭送內閣。限四十日彙齊用。

實。限十日。本省提塘赴部具領頒發。

土官大計。○康熙五十九年議准。廣西巡撫所屬土司。遇三年大計之期。其中果有清廉愛民。並無擄殺及貪殘不職。恣意侵害之員。行令該管官據實確查。具題舉劾。其升賞降革之處。分別輕重。仍照土司定例遵行。如該管官舉劾不

實一併議處。○雍正四年

諭各省所屬土司。有奉法稱職。裨益地方者。該督撫不
必拘三年大計之例。隨時薦舉。朕當酌加恩獎。以昭
鼓勵。欽此。遵

旨議定。照同知以下卓異官員之例。

恩賞朝衣一襲。○乾隆三年議准。土官皆係世襲。必
遇貪酷不法等罪。始行革職。其餘處分。俱與流
官不同。既無考覈。亦無優升。由來已久。不必列
入卓異。且土官卓異。皆由督撫申報。或因請託
不遂。以致結嫌起釁。滋生事端。嗣後土司等官

卓異永行停止

欽定大清會典事例卷一百四十六

吏部

書吏

承充
職調補
役滿

送館

考試供事

考

承充。○舊例。書吏承充。按納銀數多寡。分送各衙門辦事。○康熙二年。覆准。停止。援納。俱令各衙門召募。給予執照。開註姓名。年歲。著役日期。並地方印結。按季彙冊咨部。○六年。覆准。內閣供事。暨各衙門書吏。召募考補。或貼寫內遴選掣補。查明。並無投充重役。假捏姓名。暨文武生員等弊。取具原籍地方官印結。方准著役。咨部

註冊。外省典吏攢典經制額缺。擇其勤慎無違礙者承充。具結送該管衙門。著役每歲終仍取結送部查覈。十二年題准。召募書吏。取具印結。停止咨部。在內令該衙門。在外令該督撫。查明註冊。有未取印結先令著役者。即行除名。十四年題准。書吏承充。仍照舊例。援納。惟在京及奉天府各州縣衙門。仍行召募。二十八年覆准。有願充各部院衙門書吏者。令其具呈考試。選擇文理明通者。掣籤著役。漸次補完。再行考取。如有私行索取缺銀。或被頂缺之人首告。

或被本官查出者。送交刑部治罪。○雍正元年
諭。從來各衙門募設書辦。不過令其繕寫文書。收貯檔
案。但書辦五年方滿。為日既久。熟於作弊。甚至已經
考滿。復改換名姓。竄入別部。潛蹤掩迹。無所不為。更
有一等積棍。名曰缺主。獨掌一司之事。盤踞其中。事
無大小。一手握定。而不肖司官。交通賄賂。倚為心腹。
上下朋姦。莫可查究。書辦尚有更換。缺主總無改移。
子孫相承。竟成世業。各衙門姦弊叢生。未有不由於
缺主者。自今以後。書辦五年考滿。各部院堂司官查
明。勒令回籍候選。逗遛不歸者。著都察院飭五城坊

官稽查遣逐。至於缺主多捐納職官。原有勢力可以抗違。爾衙門職掌糾叅。立刻查明缺主的名。題叅革究。押解回籍。庶作弊之本原永絕。而官方可以肅清矣。○又

論嗣後缺主與年滿書辦發回原籍之處。著各部院一年一次保結具奏。儻仍有潛居京師者。或經朕聞知。或被科道題叅。將保結具奏之大臣官員一併治罪。○又覆准各部院考取書辦於京城出示召募各省流寓之人。有熟於律例工於寫算者。赴該衙門報名。取具同鄉甘結。定期考試。擇取撥補。

如有假冒籍貫。詭名應考者。察出從重治罪。其各省有通曉律例。或能寫算。情願充應部辦之人。亦令赴地方官報明試驗。取具印甘冊結。開明年貌籍貫。申報該督撫咨部撥用。○又覆准。現在各衙門所有假冒籍貫書辦。定限兩月。飭令於本衙門呈遞。改填實在籍貫。仍移咨各原籍地方取結存案。如有逾限不改者。一經發覺。從重治罪。○二年覆准。各省督撫所屬文武大小衙門內。有挂名吏員。及革除食糧之兵丁。改易姓名。潛充挂名吏員者。盡行革去。查驗實在

正身吏役。方令充補。至貼寫幫差人等。亦擇忠誠樸實之人充役。如有不堪供役者。即行黜革。該管官有徇庇容留姦民。指稱吏胥。躲避差徭。擾害地方者。將該管官照例議處。挂名吏役。嚴加治罪。○四年覆查。各衙門書吏。宗人府由府丞。六部由漢右侍郎。都察院由副都御史。通政使司由漢參議。內閣由典籍。翰林院由典簿。詹事府由漢少詹事。國子監由漢司業。京堂衙門均由漢少卿。欽天監由漢監副。太醫院由漢右院判。六科由漢給事中。中書科由漢掌印中書。

專管稽察。其內務府理藩院。今內務府總管理
藩院右侍郎專管。凡書役投充之初。務查該役
本籍本姓。取具印甘保結。方准著役。其年滿書
吏考職之時。務於移咨內填註。並無假姓冒籍
字樣。方准收考。若有冒籍冒名等弊。事發者。除
本員革去職銜。照律治罪外。其不能稽察之該
管等官。照例議處。○又議准。凡有司廳各衙門。
責成承辦。司廳各員。儻有重役。過犯。戀役。遲延
蒙混等弊。除該吏照例治罪外。其承辦之司廳
各員。並管轄之堂官。一併分別議處。○又覆准。

缺主之弊。外省猶未盡去。通飭直省督撫。轉飭所屬。將現有缺主。盡行除革。書役年滿缺出。遵例另募。取具鄰佑親族保結。方准取錄。如有暗行頂買。索取租銀之處。缺主及頂缺之人。照律治罪。該管官照例議處。○七年覆准。外省各衙門書役投充。務取具並無重役。冒充親供互結。該地方官加具印結。彙造役冊。申送該管稽察衙門。府州縣書吏。責成本道稽查。無道員地方。責成按察使稽查。藩臬兩司。及各道關差書吏。責成督撫等稽查。督撫及總河總漕學政。鹽院

書吏責令自行稽查。每於年終令該役出具並無過犯連名互結。地方官申送該管稽察衙門存查。儻有役滿不退。或舞文弄法招搖撞騙等情。將該吏攢黜革治罪。該府州縣並專管之督撫司道等。均照例議處。○十二年覆准。凡各部院衙門貼寫。令該管官將其姓名年貌籍貫。詳註冊檔。取具雇募之經承保結。移送司務廳註冊備查。遇有貼寫辭去及逐去者。保結之經承呈明該司官。將緣由移送司務廳除名。儻有隱匿本名籍貫。捏報詭名。及經承扶同捏飾。一經

查出一體按律治罪。○又議准貼寫內或有舞弊作弊負罪潛逃者。即飭原具保結之經承立限捕獲。其有行止不端。許經承不時舉報。一併移明司務廳。將伊姓名開除。如有徇隱作弊等情。除將該經承貼寫分別治罪外。各該管官一體照例議處。○乾隆元年

諭朕惟州縣為親民之吏。自宜廉平不擾。懋著循聲。乃獄訟催科之際。官民情意。易致睽隔。百姓潛受苦累。而無由自訴者。則以書役之為害甚劇。州縣官不知所以振刷而剔除之也。朕訪聞直省州縣衙門。經承

之外。必有貼寫。正役之外。每多白役。聚此數十輩。無賴之徒。假託公務。橫肆貪饕。其為小民擾累。何可勝言。故有訟獄尚未審結。而耗財於若輩之手。兩造已經坐困者矣。額糧尚未收納。而浮費於催徵。中飽於蠹胥。已什去二三矣。其餘句緝命盜。因緣舞弊。遇事風生。株連無辜。賄縱要犯。大率貼寫白役之為害居多。各直省督撫。務宜嚴飭各該州縣。將所有吏役。按籍鈎考。其有私行充冒者。悉行裁革。設正額書役。實不敷用。不妨於貼寫幫役中。擇其淳謹者。酌量存留。亦必嚴加約束。毋得非時差擾。至於經承正役。務須

時刻稽查。儻有壞法擾民之事。立即按律重懲。庶使若輩知所顧忌。不得肆其伎倆。儻或明知故縱。姑息養姦。又或喜其巧於趨承。受其蒙蔽。此則不愛百姓而愛吏役。即屬戕害吾民之甚者也。為民父母。其忍出此乎。且胥吏之為害。不止州縣衙門已也。凡徵解錢糧。上司書吏。輒向州縣書吏索取費用。因而縣吏假借司費。紙張名色。派索花戶。又如徵解漕糧時。糧道衙門書吏。需索縣吏規禮。因而縣吏遂句通本縣家人。盤踞倉廩。於正額外多收耗米。稍不遂意。百般留難。遠鄉小民。以得收為幸。守候為難。不得不飽其

貪壑。又聞司院衙門。凡州縣申詳事件。每先發各房書吏擬批送籤。書吏從此作姦射利。遲速行駁之間。得以上下其手。蓋衙蠹之為擾。自上及下。正不自州縣始也。是在為督撫者整肅紀綱。立闔省之表率。而監司守令各奉厥職。互相糾正。則弊絕風清。民安衽席。朕惠養元元之恩意。得以周浹閭閻矣。○又覆准書吏著役。務令報明實在籍貫居址地方。三代姓氏。該衙門於十日內咨部轉行該省。嚴飭地方官出具印結。順天限四十日。直隸奉天。山東。山西。河南。限三月。江蘇。安徽。江西。浙江。湖北。湖

南陝西甘肅限四月。福建四川廣東廣西雲南
貴州限六月。均於限內送部。轉送各該衙門。以
結到之日著役連閏計算五年期滿。○五年議
准嗣後各省大小衙門經制書吏。即在於現充
書識內。擇其勤慎辦事之人。驗看覈實。令其取
結承充。若該本官不於經承中慎擇僉點。有徇
私挂名等情。或經上司查出。除將本人照吏典
人等額外濫充律辦理外。將本官照徇庇例議
處。○三十九年議准都察院科道兩廳並各城
司坊等處缺出。即照各部院之例。於貼寫內揀

選年久歷練者充補。如本無貼寫。責令該管官照例出示招考。不許已滿書吏從中緣引。仍照定例取結著役。並飭令該管官出具並無緣引等弊確實印結。呈送都察院查覈。儻有前項情事。經都察院訪聞。或係告發。即將賣缺及營求之人。送部治罪。並將該管官指名叅處。○五十六年奏准。在京各衙門書吏供事。及各直省書吏。無論已滿未滿。概不准其改籍歸宗。更名復姓。以杜弊端。○五十九年議准。內外大小各衙門書吏充補時。該管官務須實力查驗。年過二

十歲以上者。擇其老成馴謹之人。方許充補。其
年齒太輕者。概不准充。○嘉慶四年

論內外衙門書吏。積慣舞弊。最為惡習。外省各官。遇有
題升調補議敘。議處報銷各項。並刑名案件。每向部
中書吏賄囑。書吏乘機舞弊。設法撞騙。是其常技。至
運京餉銅顏料各項解員。尤受其累。自投文以至批
迴。稍不滿欲。多方勒捐。任意需索。動至累百盈千。名
曰部費。公然斂派。即督撫往往明知故縱。至外省督
撫藩臬。以及州縣各衙門。凡應辦事件。亦不能不經
書吏之手。藉端滋弊。甚至上下勾通。均所不免。現當

吏治肅清之時。豈容猾吏蠹書。從中播弄。嗣後各省
官員。務須正己率屬。廉潔自持。嚴明馭吏。汰除冗散。
懲創姦胥。以杜外省書吏之弊。在京各部院堂官。惟
當督飭司員等。每事躬親。熟觀例案。實心勤職。儻有
積猾吏胥。密訪得實。即行嚴辦。以杜在京書吏之弊。
儻經此次訓諭之後。內外各衙門。仍視為具文。尚有
前項情弊。別經發覺。或被科道糾參。必將該管各官。
分別議處。毋謂誥誡之不豫也。○五年奏准。各衙門
新補供事書吏。限十日內。開明年貌籍貫住址。
三代姓名。及同鄉書吏保結。一併送部查覈。轉

行取結。如不遵定限。抑或舛錯遺漏。藉得輾轉行查。稽延時日。並不將該吏同鄉保結送部者。概不准其轉行取結。至已經取結。而該吏原籍咨覆文結內舛錯遺漏。往返駁查。尤需時日。除飭駁更正外。應仍照原文行到日期著役。以杜弊端。其有行查取結時。該本籍官查明實有不能按期取結情形。據實聲明。先行咨覆。旋即補具印甘。各結到部。查其逾限未久。該衙門尚未開缺另補。將印甘各結轉行該衙門。仍准著役。如該督撫業已咨覆。無憑取結申送。該吏藉詞。

搬移並寄籍原籍等故。復請行查之處。概不准行。仍照例黜革。○又奏准書吏五年役滿。即行報明開缺。儻各衙門以該吏經手事件未完。暫請留辦。概不准行。其修書各館供事。報滿後仍留館辦事者。准其咨留。○又奏准各衙門供事書吏。不得曠役。總役其有在役聲稱省親修墓告假他往者。概不准行。如實係患病。在本管官處告假調治。該科房事務。另派別房書吏兼理。如一月不痊。報部開缺另補。○十六年

諭各部院經承書吏。向來設有額缺。或多或寡。本隨部

務之繁簡。酌定章程。各該衙門現俱照舊辦理。並非
參差不齊。毋須另議增添。至貼寫一項。俱由書吏雇
覓。不過幫騰稿案。近來人數過多。紛紛入署。居然託
名辦公。從中朋比。為姦固不免。滋生弊竇。若概行裁
去。則司曹稿件繁多。責令書吏經承。一手騰寫。亦恐
難行。且伊等既非額設。即係閒散之人。並無所庸。其
裁革。總在該衙門堂官督率司員等。遇事認真。一切
查例辦稿。悉心參酌。不稍假手。經胥。致猾吏輾轉滋
弊。並留心稽察。嚴切防閑。隨時飭令書吏。毋許多雇
貼寫。如見人數稍多。即嚴行查禁。毋令混迹。則不安

本分之徒自無由作姦犯科。○二十年奏定京通各倉應用書吏由倉場衙門行文直隸總督轉飭所屬附近各州縣擇有身家善書算之民人具結保送倉場衙門到日當堂掣定名次造冊咨送吏部存案挨次補用俟充補後照各部院書吏之例開明年貌籍貫住址三代姓名咨行吏部取具原籍地方官印甘各結到部劄倉著役五年役滿考職送部給照飭回原籍候選所保之人將次用竣仍由倉場衙門行文直隸總督再行保送遇有事故原籍地方官即行申報分

咨吏部倉場將名冊查銷以杜頂冒之弊。○二十一年奏准供事書吏取結除地方官無憑結送即照例黜革外其實有不能按限取結情形先行聲覆者按正限日期多寡酌定餘限日期順天府定餘限二十日直隸山東河南山西奉天等省定餘限一月江蘇安徽陝西湖北浙江江西甘肅湖南等省定餘限四十五日雲南貴州廣東廣西四川福建等省定餘限兩月如過餘限該督撫雖有印甘各結補送到部無論該衙門曾否開缺即行查銷仍照例黜革。○又奏

准。嗣後各衙門供事書吏取結。該督撫接准部咨之日。即行飭司徑行該州縣。該州縣於十日內傳知該吏家屬。勒限三十日內具結。該縣於十日內加結。徑詳布政司轉詳咨部。其順天府屬書吏。近在京畿。該府尹准咨之日。即行飭縣於十日內傳知該吏家屬。勒限二十日內具結。該縣於十日內加結。轉詳該府尹速行咨部。所有該吏家屬奉傳具結日期。及該州縣奉文出詳日期。均令於文結內逐細聲明。咨到之日。查係該吏家屬具結逾限。即將該吏黜革。地方官

免議。儻係地方官任意遲延。或該處胥役有勒
稍情事。致逾正餘各限到部者。即將該地方官

照例議處。儻係沿途遲滯。咨明該督撫自行查

明懲辦。該吏仍准著役。其在正餘限內到部者
毋庸覈計分限。如在正

餘限外到部。即
查分限辦理。○道光二十五年奏定。凡各省

吏攬。由布政司衙門給發吏照。以領到吏照之

日。作為著役日期。應於充補後。飭令作速赴司

領照。如實因患病。令各該衙門聲明患病日期。

予限一月。儻限滿仍不克赴領。即照一月限滿

不痊例開缺另補。其餘託詞程途遙遠及公事

忙冗遲延者。概不准行。○二十六年議准。各省典吏。照定額承充。不准一名冒濫。其添設幫書。由各省督撫府尹酌立定額。年終將幫書人等三代姓氏年貌籍貫及充役日期彙造細冊咨部存案。俟幫書出缺再行召募頂補。至典吏於出缺後。即應隨時報充。不得稍令懸宕。違者該管官照例議處。○咸豐五年議定。各衙門書吏充補取結。其原籍省分並無軍務。止因道路梗塞不能依限到部。該地方官務即補行查取族鄰甘結。加具印結。並聲明遲逾緣由。送部查覈。

其無故逾限者。仍照原例。分別議處。革役如屆五年役滿。印甘各結。尚未到部。即勒令退役。概不准其註冊銓選。至補行送到文結。覈其情節。並非無故遲延。准仍以前次取結限滿之日。作為著役日期。連閏扣足五年。飭令報滿。○同治五年議定。凡各衙門額設召募書吏之缺。統限一月內照額充補。儻限內召募無人。酌量事務較簡缺分。裁汰歸併。其事務稍繁之缺。一時充補未足。於限內聲明。先行展限。其展限制。仍不得逾一月。儻查有限外充補。限內並未聲明展限者。仍行

斥革。○十三年奏定。凡各衙門考取供事。補缺移送各館後。即由各衙門查取該供事等族鄰姓氏。造冊咨部。轉行取結。俟結到。准其著役。知照各衙門。後遇有應得議敘。方准列保。儻各衙門保獎到部時。該供事原籍印甘冊結。尚未到部。即將所得議敘撤銷。不准註冊。○光緒二年議定。凡各衙門供事書吏取結冊報到部。經吏部行文查取原籍族鄰甘結。並地方官印結。於咨送到部時。除已逾例限。照例斥革。其並未逾例限冊結內實有不符。仍應行查外。至印甘結

內僅止一兩字點畫偏旁小歧。或雙單名偶異。而上下已有一字相同者。一面行文該衙門。准其暫行著役。飭令該供事書吏於半年限內。取具同鄉京官印結。將因何歧異之處。赴部聲請更正。存案備查。仍以該地方官咨送結到之日。分別限內限外。作為著役日期。儻逾限延不聲明。即行斥革。○三年奏定。各衙門書吏。無論何項缺出。承充之人。或由貼寫保繁充補。或揀選考取者。務於一月內即行充補。十日內咨行吏部轉行取結。如充補逾一月之限。即不准其轉

行取結所遺之缺另行揀補並將何年月日因何出缺之處咨部查覈註冊至向係示募招考者如實因一時招考無人先行報部查覈一經有人即照定限行文取結不得稽延時日以符定制○又奏定在京各衙門書吏缺出令承充之人報明實在籍貫取具同鄉書吏保結將原籍係某府某州縣並現在居址地方三代姓名於結內詳細聲明該衙門務於十日內即照保結內所開籍貫居址三代姓名咨行吏部轉行各該省督撫嚴飭該地方官於文到日查明並

無投充重役假捏姓名暨文武生員等弊。出具印結。及鄰族人等甘結。並令將該吏父母現存年歲據實聲明。照各省地方遠近務於所定限內將印甘各結咨送到部轉送各衙門。照例以結到之日。准其著役。仍令該督撫查察。如該地方胥役人等有故為刁難索詐勒捐遲延不依限出結者。除將勒索之書役照例治罪外。仍將該地方官分別議處。若係該地方官勒捐遲延。即將該地方官照例議處。該管上司一併查議。○又奏定各衙門書役俱有承辦案件之責。各

衙署設立科房。原係該吏辦公收存案件之所。如有書吏不入科房。並將案卷不收存衙署。攜歸私室等弊。除將該書吏按律懲治外。該管官不行查出。照例議處。○四年奏准各衙門正額書吏。原因該衙門事務之繁簡。定其額數之多寡。不容擅自增益。若實不敷用。不妨於貼寫幫役中。擇其醇謹者。協同辦事。儻各官員於經制書役。擅自酌增額數。除將本人照例黜革外。該管官一併議處。至額設貼寫。如實不敷用。准各司各廳。斟酌事務繁簡。回堂增置立案。著為定

額仍令該經承貼寫連環具保方准列名卯簿。本管官輪流查點。其有擅入科房私充散行貼寫者。一經查出。將本人與該經承一併重懲。○八年奏准內外大小各衙門經制書吏。五年役滿。例得考職銓選。俱令確查身家清白之人充補。取具族鄰甘結。由該地方官查明申送上司。報部存案。如有宦僕捏稱農民充當者。一經發覺。本人照例治罪。其主知而不首。並該管地方官。均各照例議處。○又奏定各衙門書吏著役未滿年限。遇該書吏別有事故。不能親身應役。

者。許其呈明告退。另行籤點充補。如有朦朧賄
替。希圖接算前吏年分。冒名報滿。濫邀議敘者。
一經查出。除按律治罪外。該管官照例議處。其
有詭託姓名。賄買他人已滿吏名頂充者。均按
律治罪。○又奏定。各衙門官員。如有聽受情託。
將役滿革役書役。聽其更易姓名。改移籍貫。濫
准入冊。別經發覺者。將該本官照例議處。該書
役按律治罪。如係挂名曠役。營求批准。別經發
覺者。將本人按律治罪。該本官照例議處。如係
刺字革役。濫准承充。無論正役曠役。將本人按

律治罪。該本官照例議處。該督撫不行題參。一併照例議處。凡署事官任聽原官已刺蠹役復充。及鄰封官收用別邑已刺蠹役。將本人按律治罪。該本官該督撫照例議處。○十年奏准。各關書吏充補時。責成各關監督實力稽查。如有父子兄弟朋充等弊。立將該吏嚴行究辦。仍令各上司督撫隨時稽查。儻該監督有瞻徇情事。即行據實叅辦。並於任滿時。毋許濫行通情舉保。任意留充。以清弊竇。○十三年奏准。籍隸大宛二縣土著。不准充當各部院書吏。違者斥革。

失察該管官交部議處。

役滿。○順治十四年題准。在京及督撫等衙門書吏。連閏月計算。著役五年。俱令起送。其餘在外衙門。一年一次。送部轉撥各衙門辦事。通計五年役滿送考。○康熙五年題准。在外吏員。該撫轉撥。○十二年題准。停止轉撥。俟著役五年。咨部考職。○二十八年覆准。各部院衙門考授職銜之吏員。一經吏部榜示。即令司坊官嚴催回籍。限一月內起行。取具印甘各結。一併報部。回籍後。再取本地方官到籍日期印結。申報該

督撫報部。如有潛往京城者。其藏留之家。一併從重治罪。其不行查催之司坊官。照容留廢官例處分。至各部院等衙門書吏。並令該司坊官嚴行查催。定限一月內起程回籍。如仍潛住京城者。亦交刑部從重治罪。遞解押回。其失察之司坊官。亦照例議處。○六十一年題准。

盛京工部召募書辦四名。照在京各部院書辦之例。五年役滿。咨部考職。○嘉慶十五年。

論
向例各衙門書吏役滿。即行飭令回籍。原以防積久弊生。立法至為嚴密。新疆地處遙遠。尤非內地可比。

若該書吏等役滿後。仍以籍資熟手。留而再留。狡譎之徒。因緣為姦。不可不防其漸。嗣後新疆各處書吏五年役滿。照例速飭回籍。毋任逗遛。如因新吏生疏。暫留幫辦者。亦不得留過二年。其已留再留之例。永遠停止。○光緒十一年奏定各衙門典吏例。以五年役滿。分為從九品。未入流。兩項銓選。給有部照。後方准戴用帽頂。其未滿典吏。概不准其混戴。如有濫行戴用者。一經發覺。除將本人照例治罪外。該本管官或未經查出。並有意故縱。照例分別議處。該地方官不能查出。及已經查出。瞻

徇情面不即舉報者一併分別議處。○十三年
奏定在京簡缺書吏供事役滿由各衙門自行
考試授定職銜。俟吏部覈明將執照發交本衙
門傳令收領後該衙門即將書吏姓名籍貫咨
送都察院轉交五城司坊官飭令回籍內閣即
用供事及各部院衙門繁缺即用書吏於役滿
之後出具考語咨送吏部掣定職銜照例行文
該衙門該衙門即將該書吏姓名籍貫造冊咨
送都察院轉交五城司坊官令其回籍均限一
月內起程報院存案仍行文該吏原籍督撫轉

飭地方官將到籍日期報院備查。其有逾限不
即起程者。該司坊官呈報吏部。將職銜斥革。立
即遞回原籍。如出京後。除去該吏省分例定程
限。半年不到籍者。該省查報到院。亦即咨部將
職銜斥革。或復潛行來京。一經查出。將職銜斥
革。責處遞回原籍。交保嚴行管束。再犯。加一等
治罪。告退革退之吏。該衙門亦即行知都察院
五城。勒限一月回籍。違者遞回原籍。交保管束。
已滿書吏。有加捐佐貳等官。毋庸在部投供候
選者。俱一體勒令回籍。不准藉詞逗遛。違者斥

革儻司坊官不行催令回籍容留在京並復行
來京潛住失於查察將司坊官按依名數分別
議處

送館○嘉慶五年奏准

內廷修書各館及各部院衙門則例館遇有應修
書籍按其篇頁之多寡事務之繁簡酌定需用
供事若干名即行奏明將原奏移咨吏部存案
如未經奏明及溢於所奏額數之外咨部註冊
取結概不准行○又奏准

內廷修書各館所需供事均遵照奏定名數於內

閣翰林院詹事府等衙門額缺供事內。分析咨
取充補。如本館自行召募充補者。概不准行。
又奏准各部院則例館需用供事。均遵照奏定
名數於本衙門額設經承內揀選充補。如人數
實係不敷。方准於年久貼寫內擇其字畫端楷
文理通順者充補。取結著役亦不得浮於經承
之額。若貼寫充補多於經承。以及臨時召募者
概不准行。○又奏准修書各館將屆告成之時。
該館供事有病故告退。或誤公黜革者。即毋庸
拘定額數另行充補。如有臨期增添更換者。概

不准行。

考試供事。○嘉慶五年奏准內閣翰詹等衙門
考取供事。出榜後即將該供事等取定姓氏名
次籍貫造冊移咨吏部備案。遇有缺出挨名充
補不得撓越。到館十日內將姓氏名次及到館
日期咨部查覈相符方准轉行取結。○七年

諭內閣供事與各衙門書吏無異保甯甫經到京。因考
試供事外閒頗有浮言。請在貢院考試。經朕發交禮
部議奏。以貢院為抡才重地考試吏胥於體制未合。
所議固是。但議請欽派內閣學士及監試御史並護

軍統領等員。仍與考試士子相等。辦理尚覺過當。嗣後內閣供事。仍在天安門外考試。即令稽察內閣之御史。會同內閣承辦官員。在彼監試。其閱卷之內閣學士。著大學士等指派滿漢學士各一員。臨期奏聞。不必請旨簡派。○十一年

論宗人府供事。且毋庸考試。其各衙門有應需考取供事者。著大學士會同軍機大臣另行妥議。章程具奏。欽此。遵

旨議定。嗣後投考之人。取同鄉京官五品以下七品以上者。出具身家清白。委係親身赴考。並無頂冒。

印結於報名時投遞。每京官一人。每次止許結送一人。所保既隘。姓名必真。除京官內尚有不願出結者。計每次取結投考之人。必不致如前濫溢。該衙門查明實無逾額多保人數。方准收考。違者。詢明扣除。收考之人內。如有捏名虛冒者。將出結官查取職名議處。其京官無司印衙門。准照出圖結之例。用圖結黏連印結投遞。保認。仍以圖結官為憑。以專責成。考試日。令該衙門派出承辦官員。攜帶冊結。點名時。同監考御史。覈對年貌。散卷收考。卷尾彌封姓名。照舊例。

試以告示一道。以二百字為率。收卷後閱卷官
校其文理字畫。秉公挑取如額。即日眼同監考
御史。拆閱彌封。出榜明示。次日仍同原監考御
史。傳集所取之人。於卷後書字一二行。令原保
結官當面辨認。人數無多。斷難混淆。如有年貌
字迹不符者。即可立時舉發。驗明實係親身。並
無虛捏者。按依所取名次。造具姓名籍貫清冊。
移咨吏部存案。其後有改姓更名者。概行扣除。
以杜假冒。考取均以本衙門實缺為憑。每次照
實缺額數。加一倍錄取。如宗人府額設供事十

四名。每次止准取二十八名。內閣額設供事六十二名。每次止准取一百二十四名。翰林院額設供事十六名。每次止准取三十二名。詹事府額設供事十名。每次止准取二十名。所取既有定數。則挨次充補。不敢積壓多名。久閱歲時。豫為冒名頂充地步。如閱卷官有於數外多取者。令監考御史指叅。其考試之期。內閣缺多。候補不及十五人。宗人府。翰林院。詹事府。缺少。候補不及五人。方准再考。嗣後內閣考取供事。遵奉

嘉慶七年

諭旨。令大學士於內閣學士內。指派滿漢各一員。宗人府。由宗令宗正於左右宗人及府丞內。臨期奏明。指派二員。翰林院。由掌院學士於滿漢讀講學士內。臨期奏明。指派二員。詹事府。令滿漢詹事少詹事。臨期自行奏明。輸出二員。秉公閱取其監考御史。即令稽查該衙門之滿漢御史。屆期前往。毋庸奏派。以歸簡易。○十六年

諭。各衙門考試供事。往往於招考之後。日久宕延。又緣收考太多。以致弊端叢生。有營倩冒考等事。今翰林院酌擬章程。稱該衙門額設供事十六名。照定例再

備額外供事十六名。額外懸缺五名。即行招考。如數補足五名。收考不得過三四十人。出示後即行投考等語。似此人數既少。辦理迅速。便於稽查。則諸弊可以盡除。嗣後各衙門考取供事。均著照此章程。隨時妥辦。○又

論翰林院為京員清秩。非行走司曹可比。若紛紛代供事。出結考試。臨期識認。於體制未協。嗣後各衙門供事。所有編修檢討庶吉士等官。不准出具圖結。其邊遠省分。在京六品以上人員較少。著准其取具七品京官圖結。再加印結收考。若有六品以上人員。可出

印結者亦不准出具圖結。

考職○順治十二年題准。文選考功二司會同考試吏員。在外取具原籍印文。在京取具同鄉京官印結。並五人互結。投部覆查。照前磨對相符者。方准收考。如文到部後。一考不到。次年仍准補考。兩考不到者。除名。試期定於每年八月。考試申文告示各一道。論文義優劣。分別等第。○又題准。吏員考職。分為正八品。從八品。正九品。從九品。一等雜職。二等雜職。三等雜職。○十五年題准。吏員出身。止於九品以下職銜。分為

五等。一等授正九品。二等授從九品。三等授一等雜職。四等授二等雜職。五等授三等雜職。○康熙三年題准。吏員考職。分為四等。一等以正八品經歷用。二等以正九品主簿用。三等以從九品用。四等以未入流雜職用。○四年題准。吏員改隸。驗封司考定品級。付送文選司。照考授年分。截取人文到部聽選。○十二年覆准。吏員送考時。或有丁憂事故者。令各部院該督撫確查。如果勤勞無過。取具印結。並著役及役滿月日。年貌籍貫造冊。該部院督撫出印文保送到。

部。據冊結收考。○五十七年題准。吏員考職。照監生考職之例。交與九卿會同校試。考定職銜。其各省領文赴考者。令該督撫轉行各地方官。取具本吏親筆親供。里鄰結狀。黏連印結。該督撫給予印文。保送赴部。其在各部院衙門領文赴考者。令各該管官。取具本吏親供。黏連印結。保送赴部考試。如試卷筆迹。與親供筆迹不同者。即係假冒頂替。查出。將本吏黜革。與頂替之人。一併從重治罪。○雍正元年題准。內外吏員攢典。役滿考職。令本部該司官。按名驗到。詳細

查對如有年貌不符聲音不合者不准收考。其實係本身應試者照例考取分定職銜。臨期照監生考職例將九卿大臣翰林等官職名開列具題派出閱卷。○又奉

旨。年貌不對者裁去。伊等寂然則已。若說伊是正身。情願考試者照常考試。將此人留在此處行文原籍地方徹底查明。俟送到之日。若有頂替情弊顯出。從重治罪。若係正身即用。○二年題准大選雜職暫將年滿供事禮部儒士及應升應補並捐納即用先用人員。教職改選縣丞主簿等官。照例選用。其

京外應選雜職暫停銓選。行文各督撫將康熙十七年至四十三年已未截取應選正八品以下等官。令原籍該州縣驗看確實。詳開履歷年貌。加具印甘各結。按年逐項造冊。申送該督撫。詳加查覈。彙為總冊。註明人數。用紙封固。由驛遞送部。查對考冊。內外相符。方行銓選。其四十三年以後。至雍正元年各員。亦照前陸續造冊送部。嗣後每次考職。行文本省。按年查對造送。其寄籍順天府屬州縣者。取本衙門著役前後同辦事考職書吏五人。連名互結。仍令呈送各

該員到部驗看。如仍有假冒頂替者。將該督撫
府尹及保送府州縣官。均照通同徇庇例嚴加
議處。○十二年議准。直省吏攢。五年期滿。該管
衙門申送督撫。每年七月內關防考試。其試卷
封固。並原著役日期及履歷。造冊送部。限每年
十月內到部。歲終合內外吏員試卷。校定等第。
將其受職執照。封發原籍省分給發。○乾隆二
年題准。內閣事繁供事。各衙門事繁書吏。五年
役滿無過犯者。送部免其考職。即以從九品未
入流。兼掣選用。其供事有投赴軍營效力者。亦

免考職。給予正八品銜先用。其事簡供事書吏。役滿報部。考試告示申文各一道。論文義優劣。分別等第。其事繁供事書吏。送修書各館者。亦考職。以館班別選。○十五年議准。嗣後京外吏攢役滿。仍照例考試。年終彙齊解部。嚴加校閱。分別去取。不准全錄。以示慎重。○又奏准。嗣後京外吏攢試卷。於年終彙齊。校閱時。將九卿翰林等官職名。開列奏請。

欽點數人在

朝房內秉公校閱。分別去取等第。按其所定名次

奏

聞後。交部拆封。填寫姓名。揭榜曉示。註冊銓選。○二十年奏准。書吏役滿報部。彙至三月。考試一次。考試後。知照都察院。飭五城司坊官。勒令回籍。其試卷封固存儲。俟年終。各省吏員試卷到齊。一併校閱。將考定品級執照。封發原籍。給領。一考不到者。下次准補。兩考不到者。除名。○三十四年奏准。嗣後在京簡缺書吏役滿時。即由各該衙門自行考試。以便就其平日所熟識者。一覈對年貌。庶頂替代倩之弊。無可復施。試畢

一面知照都察院飭令回籍。一面將考過各卷
加具冊結封送吏部。於年終彙入外省各卷。一
體奏請校閱。○五十五年奏准。在京各衙門繁
缺供事書吏。五年役滿送部。以從九品未入流
兼掣選用。毋庸考職。其事簡供事書吏。並在外
各省吏攢。役滿時。令各堂官及各督撫於每年
七月內彙齊。嚴密考試。自行錄取。分為二等。以
從九品未入流兩項咨部註冊。填給執照。應將
吏員錄取正八品正九品兩項。並年終彙齊奏
請

欽點校閱試卷之處概行停止。至供事書吏有撥送修書各館者。應以原衙門著役日期前後接算。五年報滿。刑部律例館供事由各衙門著役四年以上書吏咨送。定以到館補缺後限二年報滿。無分繁簡一體考授職銜。以館班別選考職。後有咨明留辦者。遇有議敘。准其照銜議敘選用。其錄取定額。在京各衙門不得過十分之七。在外各省不得過十分之五。其僅止一名不敷錄取者。如實係當差勤慎文理明通。仍准錄取。如有已屆期滿。因見本年同考人多。趨避去取。

不即報明考試。蒙混入下年送考者。查出將本人黜革。該管官一併議處。○又奏准。役滿吏攢。定以每年七月內彙齊考試。令各堂官及各督撫。將錄取試卷。並該吏年貌籍貫三代姓氏。造具清冊。限於本年十月內。送部註冊。如有已過七月後。試期報滿者。俟下年彙辦。不得歸於本年送考。以免參差。○又奏准。凡京外各衙門簡缺供事書吏。應考時。遇有丁憂患病事故。不能赴考。該管官查驗屬實。咨明吏部存案。准其下次補考。如過兩次不補考者。除名。其考試一次。

不取。不得再考。令各處將不取之姓名籍貫。隨同錄取吏員冊卷。送部存查。以杜重考之弊。如該管官有將上次未經錄取之人。混行送考。並有將未曾親身充役之人。濫行送考者。別經發覺。將書吏治罪。該管官照例議處。○五十六年奏准。在京各衙門役滿書吏。於文到日。查明合例。將執照封發著役衙門。限一月內給發。在外役滿書吏。於文到日。查明合例。將執照封發各督撫。轉發該地方官。限兩月內。傳令本員驗明給發。如有違限。即將執照繳銷。停其銓選。其在

京在外給發執照。俱取具本員親供甘結。年終彙冊報部。以備查覈。○嘉慶五年奏准。凡吏員授職執照。遇有水火盜賊遺失無存者。報明該處地方官。出具印結。開明本員年貌籍貫。著役衙門。授職年分。咨部查覈。與原報之案相符。准其補給。○又奏准。在京簡缺書吏供事役滿。由各衙門自行考試。授定職銜。俟吏部覈明。將執照發交本衙門。傳令收領。後該衙門即將書吏姓名籍貫。咨送都察院轉交五城司坊官。勒限一月內回籍報院存案。仍行文該吏原籍督撫。

轉飭地方官。將到籍日期報院備查。至內閣即用供事。各部院衙門繁缺即用書吏。於役滿後該衙門出具考語咨送吏部。掣定職銜。照例行文。該衙門飭令回籍。即將該書吏姓名籍貫造冊咨送都察院轉交五城司坊官。限一月內令其回籍。儻司坊官不行催令回籍。容留在京。並復行來京潛住。將失察之司坊官按依名數分別議處。

調補。○乾隆五年議准。各衙門調補書吏。除以繁調繁。仍以原著役日期接算外。若由簡調繁。

其著役未過二年調補者以原著役之日接算
年滿即用如已過二年調補者以簡額著役之
日接算。役滿考職不得混入即用。